

Pagpahisama sa Kasaysayan sa Simbahan sa Atong mga Kaugalingon

Kalihokan A

PAGSANGYAW SA EBANGHELYO

Si Propeta Joseph Smith misulat, “Ang pagpanglutos wala makapugong sa pag-uswag sa kamatuoran” (*Kasaysayan sa Simbahan*, 4:540). Ang Ginoo sa kanhi nagtawag og daghang miyembro sa Korum sa Napulog Duha ka Apostoles sa pagserbisyo og mga misyon sa gawas sa nasod. Bisan pa sa mga sakit ug kalisdanan, kadtong determinadong mga igsoon mibiya sa Nauvoo ug miserbisyo. Isip resulta, linibo ka tawo—kadagahan gikan sa England—ang nakadawat ug pamatuod gikan sa Dios, mipasakop sa Simbahan, ug miadto sa Nauvoo. Sila nakapalig-on gayod sa Simbahan.

Basaha ang 1 Nephi 3:7 ug Doktrina ug mga Pakigsaad 3:1, ug ikonsiderar kon sa unsang paagi kini nga mga bersikulo konektado niini nga ehemplo sa misyonaryong buhat.

Kalihokan B

PAGTUKOD SA RELIEF SOCIETY

Samtang ang mga Santos nagtukod sa Templo sa Nauvoo, namatikdan sa pipila ka sister nga daghan sa mga lalaki nga nagtrabaho sa templo ang walay igong mga sapatos, mga pantalon, ug mga sinina. Gidasig sa Ginoo, nag-organisar silag grupo sa mga babaye ug nagtinabangay sa paghatag niini nga mga sinina. Parehas sa mga grupo niadtong panahona, naghimo silag konstitusyon. Ilang gipakita kang Joseph Smith ang dokumento alang sa iyang aprobahan.

[Dihang nakita kini ni] Joseph, [siya] miingon nga mao kadto ang labing maayong konstitusyon. ““Apan dili kini mao ang inyong gusto,” miingon siya. “Sultihi ang mga sister nga ang ilang mga halad gidawat sa Ginoo, ug Siya adunay butang nga mas maayo alang kanila. . . . Akong i-organisar ang mga babaye ubos sa pagkapari subay sa sumbanan sa pagkapari.” (*Mga Santos*, 1:511)

Niadtong Marso 17, 1842, gisugo sa Dios si Joseph Smith sa pag-organisar sa Relief Society. Padayong gidasig sa Dios ang mga lider sa Relief Society sa pagserbisyo ug pagpalig-on sa mga miyembro sa Simbahan ug daghang uban pa.

Basaha ang Doktrina ug mga Pakigsaad 58:26–28, nga mangita kon sa unsang paagi kini nga mga bersikulo konektado sa dinasig nga mga babaye nga maoy hinungdan sa pagkatukod sa Relief Society.